

四庫全書

集部

欽定四庫全書

集部

定庵類稿卷一

詳校官庶吉士臣翁樹培

主事臣呂雲棟覆勘

謄錄舉人臣秦隴

欽定四庫全書

集部四

提要

定庵類稿四卷

別集類三 宋

臣等謹案定庵類稿四卷宋衛博撰博宋史無傳其集諸家亦未著錄惟散見永樂大典中考宋中興百官題名記載乾道四年正月衛博為樞密院編修官四月致仕知其終於是職然平生事蹟已不可考惟集中送楊舒

州詩有我昔懷軍書西行盡淮泗語知其嘗
參戎幕耳所作凡表劄牋啟序記書疏之類
無所不備而什九皆為他人屬草者特原本
多直標題目不署明代字故往往不可辨別
今以宋史參証如辭免職名劄有更化之初
叨居政地及長沙資殿等語則當為代黃祖
舜作辭免御營使江淮都督表有戎輅親征
及太上起臣於戎馬飲江之際陛下眷臣於

龍飛御極之初等語則當為代楊存中作又
所上諸啟中如魏參政為魏杞葉參政為葉
顥洪參政為洪遵周參政為周葵蔣樞密為
蔣芾皆一時名臣又有奉使汴京真定府燕
賓館錫宴諸表似嘗從人使金者而集中送
薛左司序則稱諫大夫王公將出疆求幕下
士監丞陶公以某進會疾作不果考之於史
使金者乃王之望旋即召還則博實未北行

諸表殆預擬而未及用者蓋博本以表奏四
六擅長故每為當時顯貴者所羅致而觀其
所作亦大都工穩流麗有汪藻孫覲之餘風
非應酬牽率者可比惜其流傳不廣幾致亡
佚謹抄撮薈粹釐為四卷存其梗概俾不至
終就湮沒焉乾隆四十六年九月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

定庵類稿卷一

宋 衛博 撰

五言古詩

送長壽黃主簿

黃郎千人英凜凜霜松姿鄴侯三萬卷載復無遺辭十
年居太學辛勤厭朝蓋詞場事雄俊傲睨深叢羅再拜
天子前袍笏光陸離竭來皖水濱樂哉同襟期顧我蓬
之心友姬慙非宜朝來擺征衫悵望當分携君家閩海

陬去作楚郢歸大哉天宇間會合固有時丈夫志八表
曲士守一涯錦衣行未暮鸞桂先高枝清潤照冰玉唱
和共塤篪行行得所詣何必事叮咛寒江清無波愛景
搖牕扉袞袞江上山萬象供品題還登古石城往和白
雪詩儻因西飛鴻寄我長相思

偶成雜意四首

清風被草木歲歲蕃中國佳蔭欲翳空擢秀何爭妍黃
楊獨咫尺更說厄閏年惜哉堅正姿何獨慳於天

長松栽萬年必在千仞巔
卑哉蓬蒿間斥鷃無高騫
如
何一杯水活此橫海鱣
誰能激滄溟為子搏青天

方朔出世士揮斥隘八極
乃與優侏儒饑飽同一食
調
笑劉天子給之聊一劇
此意竟不傳無人子思側

朝草百幅牋暮草千函書
貴人肯首耳一言躡雲衢
但
見人因子不見子亦如
梁間嘯者誰知是鬼揶揄

送楊舒州

我昔懷軍書西行盡淮泗
是時敵方張長江飲渴騎
愁

將何一律兩地一朝棄川原厭膏血關山接烽燧歸然
舒子國屹立于戈地中有袴襦民未可文法治瘡痍待
良藥天子念循吏誰厭承明直雅是詩書帥淮揚君肯
薄吾丘世寡二正須烹鮮手往述羨魚意前驅觸炎熱
弭節及涼吹朝衙百吏散閉閣有餘致臨州古云樂此
理敢輕議近聞今單于已遣朝正使公師杜征南郡得
漢龔遂里問息愁歎扞牧殆餘事政成多暇日寄我千
金字淮魚秋正美瀟山日空翠匹馬不作難為公十日

醉頗見有此客要使州人記

不寐

夜深耿不寐鼻息聞比鄰家童亦倡酬轟雷隱牀湑病
夫默歌枕愈覺展轉頻天籟寂不聞獨此聲輪困懸知
鼾睡夫定非識字人不然事紛糾豈得全其真世上學
書兒頗結煩惱因多識一丁字便欲了八垠誰甘凍龜
縮競作寒螿呻今日為何時酣寢圖安身往往中夜興
起舞徒逡巡大哉出世士天地衾枕均首壓西山巔氣

盖北海濱死生一夢覺寒暑同屈伸時於兩踵間出息
疑氤氲蝴蝶亦翩翩客主誰疎親譬如善飲人號呶觀
衆賓又如富家翁經營笑彌貧優游木鴈際卒歲誰斧
斤問我無眼禪答君妙入神我亦起洗醺軟脚長安春
垂我大鵬翼脂我神馬輪未經華胥國聊追葛天民夢
回復惘然喚起啼叢榛

二猫詩

地偏人跡希齋厨冷如刷老僧挑野菜豈識腥與血饑

鼠知自遷畜猫竟徒設我來客南齋盤餐稍羅列烹炮
愧寡鮮棄置謝瑣屑二猫亦慕羶嬰跚事爭齧小兒強
解事叱逐加撞秘尺箒未去手二猫復及闌懲羹肯吹
糞廢食未因噎小兒恚猫癡提耳當割切謝兒兒勿嗔
我曹更癡絕要之等為口已矣莫中熱

題安流亭

福州諸卒赴建康大閱還出劔津遂登舟東
下較之度嶺有兩日之間其勞佚甚不相侔

卷一
時僕亦抵江頭馬病人疲雅有登舟之意舟人告不容獨趨陸道明日流屍滿灘乃知其已覆溺惋歎久之作詩記其事

劍潭百尺深中有神物蟠東流竝山脚鑿鑿穿巔岼廣擬一葦航聲戰兩耳寒異哉黃頭郎放棹隨飛湍勢若從天來千仞轉一圜百里不及眴孰與嶺道難長篙信敏手岸石如劍攢江頭憚瘡痛誰不謀所安嗟嗟彼征夫遭時棄師干不裹馬革中來葬魚腹間壯士等死耳

此命良辛酸僕夫第知免笑言雜悲歡寧知利害塗倚
伏如毫端豈無跛男子不救為可歎晏安有鳩毒懷哉
宜鑒觀

七言古詩

醉歌行

軟沙挾徑草微微畫堂甲帳光流離堂外花驄瑪瑙羈
傳呼直到黃金墀黃金墀下班如剪蒼槐不動蟠蛟螭
出門膽落金吾將歸去泣走銅山兒河龍供鯉桂為醑

御厨珍送絲絡垂乾坤整頓萬事了蹴踏四海乘丹梯
丈夫生時重意氣胡為到處潛傷悲鄉里小兒狐白腋
五陵豪客顛倒衣酒酣耳熱歌浩蕩揮斥八極隘九圍
投戈却日日不住焚膏尚卜升朝曦君看博浪沙中客
圯下偷生天地窄相期要看後五日路逢莫問前一著

贈王君用求畫小屏

先生本是談天口雲夢胃中吞八九一丘一壑未忘情
得之於心應之手分裂玄圃翻瀟湘鬼神夜泣蛟龍藏

興來八極眇揮灑陵奪萬象歸微茫十日一水五日石千
年王宰今相識已知相識意相親異時直恐空相憶跨鯨
挾矢滄海遊袖無顛顛無乃羞促迫能事吾豈敢激昂浩
興君應酬崩崖厭床浪翻屋咫尺端將萬里蹙我生有意
水石間枕漱湏君一屏足

送齊六歸石城

春衫快馬君來時寒江穩泛君今歸人生聚散定何許悵
望十年三別離憶昔見君石城下雜佩瑤瑜間蘭麝三年一

鳴驚倒人欲和薰風奏韶夏翰林主人子墨卿文章意氣飄
朝雲君歸但掃三千牘後會却揖賢書登離離漠漠霜蕪
沒江上陰風攪寒日不用長吟河畔草與君且盡盃中物

七言律詩

次韻張司法題鄭少尹庭下緋桃

梅飄柳墜早春中庭下緋英細作叢刺眼定添新葉綠傷
心應似故園紅玄都怨感成塵事石髓追游滿地風報答
春光須作意亂飄繁萼向晴空

張君請同次前韻速鄭少尹賞桃

邂逅溪源一夢中空餘羅袖疊春叢生憐烟杏勻肌薄
不分江梅映肉紅要識臨塘比西子便須索酒對東風
隨君拄杖敲門去莫惜舣船一棹空

十二月十七日病中立春

綵勝宮花鬧九門挽回和氣入乾坤未教柳樹誇青眼
先與梅花作返魂不見新蔬行節物漫將一歲答春溫
病軀可是能頑巧偏發天公造化恩

次韻贈汪解元

邇來待詔溢金門
詫賦誇詩陋古文
獨念典謨誣舊注
直將堯舜望吾君
公車兩吏催朝奏
乙牘中宸達夜分
且忍羈孤度殘臘
行看漢殿賞凌雲

再次前韻送行

匆匆行役駐無因
縞紵相看足禮文
江濶孤舟誰伴我
夜闌尊酒獨思君
離筵不用歌三疊
元夕重來月十分
更欲四方隨孟子
此生安得化為雲

次韻汪解元留別

留別詩成語更酸誰憐索米困長安聖朝有意臺萊詠
高士無嫌桂栢寒聞道新書行入奏少陪征棹慰餘驩
一封臨召君須出山色溪光不可餐

次韻贈汪解元行

平湖畫鷁春無際古寺名花色斬新走馬未同追勝處
出門翻作送行頻詩成轉覺傷離緒別去應煩說舊因
野店無人山月白明朝尊酒更愁人

次韻酬大光見贈

十年蹤跡並萍浮
今日行藏謾倚樓
明月相思淮水外
東風吹夢越江頭
深深庭院驚春晚
淡淡鶯花稱客愁
記取追隨休暇日
殷勤陶謝許同遊

次韻謝王使君見贈二首

西江派別幾經年
聖處騷人總未傳
遺我驪珠三歎罷
乞君霞佩一翩然
自聞流水知音趣
苦厭秋蟲傍耳煎
歸去寒光驚蔀屋
明朝紙價溢都廛

功成刻楮謾三年技拙空慙不可傳
晚事韓門稱弟子終期幕府頌燕然
相看霜幹寒猶在未許蘭膏明自煎
祭竈乞隣端有志只愁多指費困廛

次吳國器韻

平生不作稻粱謀身世江湖一舸浮
顧我方論天下事喜君還向古人求
塗窮解識知津意歲晚應甘短褐憂
便欲盡攜書策賣東家還許問鄰不

次何友直韻

野棠堤柳固依然無奈輕寒濕暝烟鶯語匆匆無意緒
花時寂寂廢詩篇曉來洗出天容靜空外吹殘雨腳連
春色便須同檢校已隨流水半涓涓

次韻王大光見贈

頭角崢嶸冠八龍相逢宛馬昔從東披懷一笑交情重
轉眼三年世事空浪迹偶登君子里歲寒今見古人風
新詩欲報非瓊玖涉獵由來愧呂蒙

春晴

柳梢梅子暗春城
深院誰家曲水橫
海燕未來人鬪草
野鳩相喚雨初晴
韶光縱好都來幾
客抱如今作麼生
風物不堪頻檢校
曉來花落半階平

次韻春日書懷

是非無遇不心亨
此道吾猶及老成
知己相逢須管鮑
傳家各自歎韋平
幽居幸有簞瓢樂
高枕從看宇宙清
富貴儻來安足計
且應尊酒話平生

送江南聞秘校

胃中逸氣凜橫秋歎唾珠璣落九州堪歎羣兒自相貴
如君百戰未封侯相逢不啻平生舊一笑還從汗漫游
好去慇懃護行李要看鯨海試吳鉤

過江上

地名三山

失脚塵凡不易收莫思冠佩裹狙猴但逢司馬心相許
便擬中郎賦遠遊水蓬萊三萬里仙家日月八千秋
聞名徑欲茲山隱不學劉郎世外求

答吳子文

東游吳苑定何年猶有佳名處處傳
殆過百聞今果爾相逢一笑兩欣然
強歲燕石知君厚試乞鸞膠為我煎
世上功名端易與共期雲翼跨芝廬

和人雪詩

白玉樓臺近廣寒冷侵銀海眩光翻
只應天上梨花老聊作人間柳絮繁
慶卜有年先一白喜隨寬令到千門
使君浩興憐詩酒雋飲誰供五石尊

病中書懷

平生技拙笑屠龍去國尤慚易道東回望飛雲親舍下
不堪伏枕左書空四方未了男兒志一飯長懷國士風
憐我已深兄弟好願從之子客東蒙

書懷

一劍西來又蒯緱空餘逸氣凜橫秋羈情正類南飛鵲
生事渾隨萬里鷗歲晚已驚霜入屨夜寒唯有月當樓
四方八表男兒志留滯江干恐白頭

萬里江山一褐裘十年蹤跡並萍浮困禾誰展周郎指

負米長懷季路憂書劍未酬平昔志水雲空結異鄉愁
悠悠萬事書空足獨立西風自點頭

次韻張君倚春郊且速東山之遊

澱色嵐光暖更妍陰晴恰稱養花天惱人春事濃於酒
得意莎茵軟勝綿欲把風光供翰墨直須杖屨躡雲烟
知君已作東山興緩步何辭十里阡

明日出城愛其平沙淺水有錢塘西湖氣象借

前韻呈諸公

花紅水綠鬪春妍
長望江南憶樂天
黃栗留鳴山寂靜
野棠梨發樹蔭綿
樓臺三竺將歸路
氣象西湖欲晚烟
風物不殊鄉國異
好尋歸馬問長阡

七言絕句

春日書懷

東風吹雨半斜斜
青草池塘憶謝家
池上桃紅春色
傷心不見洛城花

人世逢春能幾回
區區從使寸心灰
故園花柳應依舊

萬里歸思獨上來

奏劄

上殿劄子

臣聞君天也天以元氣祖羣物君以神道制萬方盜
焉而春燠焉而夏凜焉而秋肅焉而冬盤薄乎太虛
之中胚胎融液不可測知而萌者達屈者信潛者奮
生者遂人徒知確然在上若以不宰為功而不知天
之所以祖羣物者以元氣之正也經之為文緯之為

武威之為刑慶之為賞奔走乎四海之內動化鼓舞不可測知而大者畏小者懷亂者定肆者束人徒知巍然在上若以不勞而治而不知君之所以制萬方者以神道之設也惟元氣正則茫然運宵然化所以為天之高惟神道設則震動靜專參侔開闔所以為君之尊仰惟陛下躬大歷服于今六年賞慶刑威文昭武烈所以恢張天紀奠安區極宥天下以不測之神者固已與天侔大無間然矣

然臣猶有是說者以臣之愚竊謂陛下有四三王之資
一九州之志銷鑠羣慝冠帶百蠻之略而功之所加化
之所被尚未酬聖神之心此臣區區所以益願陛下體
乾之健秉夬之決而執神之機以運天下則何事之不
成何征之不服何政之不治哉取進止

上殿劄子

臣聞人各有能不能羿之射精矣而不能敵秋之奕造
父之馭至矣而不能舉烏獲之任鑊冰者不可使琢玉

刻朽者不可以鑽堅礱之樂削之門宮之守雖聖人不
能廢其用夔之樂垂之工皐陶之理雖大舜不能更其
任所貴乎量材授職因事賦官者正在是爾今之仕者
自一命而至於公卿自筆楚簿書而至於稽古禮文之
事莫不欲擅其能苟以一藝自名一能自售者非特其
心歉然不滿而人固亦小之此古之所以職業設而萬
事治後之所以職業設而萬事隳方且喟然有乏材之
嘆則亦厚誣天下之士矣仰惟陛下焦心望治虛已任

人士有尺寸之長未嘗不錄舜之所以為舜陛下蓋得之矣雖然張湯官御史大夫而仍兼治獄劉晏位宰相而不去鹽鐵度支此特漢唐近事堂堂聖朝豈固因循軌轍而分處昔人之下哉臣愚望聖慈詔執事大臣無責人以全枝無強人以不能明習典章者則使之居臺閣善調盈虛者則使之主國計治獄者必法理之士分間者必智勇之臣錄所長護所短久任而責成之將見百工熙而庶績凝策勲乎三五之上矣取進止

代陳直閣奏劄

臣竊觀昔之盛帝明王所恃以經理天下者亦有誠信而已耳故一政事之立一播告之修天下之士惟恐聽從之或後非畏夫刑威而然也非慕夫慶賞而然也徒以誠信而感於人有素彼中心知上之所為必也有利而無害有益而無損有可行之悠久而無目前苟且之弊甚者可殺而不可使非其上以為不誠不信於戲此其所以為盛帝明王而坐享無為之治者乎我國

家聖祖神宗繼繼承承相授而守一道顧豈外夫此哉
內而中國誠信之道素著故民心莫不悅隨外而四裔
誠信之道素行故遠人莫不效順是何觀感如是之速
耶臣嘗深求其故彼四方千里之遠盖自中國推而致
之中國郡縣之廣盖自朝廷推而致之朝廷一政事一號
令無往而非誠信之所在積久歷遠斯民目之所見耳
之所聞身之周旋乎其間安在而非誠信乎驅之而必
往詔之而必從無有非上之所建置者廼其勢然也恭

惟陛下自臨御以來凡見於設施舉措皆仰則太上皇
神謨聖烈之見於已行已試者誠信之道固已得於心
傳之妙宜乎內而中國外而四裔無不悅隨而效順今
也敵人未至於誠服而郡縣之間容有奉承宣布之未
至者豈政事號令之積容有戾於誠信者乎臣愚備數
列郡朝廷有大政事固非䟽遠小臣所得與聞且如起
發上供一事謂無所戾於誠信不可也始也使就池
交納既至池州未幾改往廬州未幾移之行在不惟搬

運轉徙有不勝其勞而舟車給餉有數倍之費加以州縣傳檄吏胥奉行憚於煩擾復不能即時支遣使管押官吏得効力職事往往遷延歲月是致欺弊百出官物耗散其幸而得免虧失終始全保者纔十一二耳彼損折之數上司不免督責官吏不免監繫下逮兵典篙工之徒均償所負破家滅門無所從出有終身拘繫卒不免於死者其弊豈在彼而不在乎臣愚欲望聖慈戒飭臣下及州郡綱運合行起發先議定交納去處無致

數有改以蹈前日之弊不惟州縣易於奉承抑使管押
網吏之徒得免相繼坐累至於傷生是亦發政施仁之
一端而朝廷誠信當自積之以著於中國行於四海也
視其事疑若至微究其末為害至大惟陛下察臣愚衷
而特加留意焉天下幸甚

辭免職名奏劄

臣顧惟一介疎賤何以仰稱天地生成之賜徒以臣自
塵祿仕垂三十載憂患屏棄間日居多頃嘗兩持使節甫

及踰年再試州麾皆成中輟退思平昔蔑著外庸今者
長沙巨鎮一旦驟被寵寄恐非綿薄所克勝任是敢力
控愚衷冀回淵聽游攷詔旨訓飭丁寧臣欽體德意不
敢再有辭避誓當勉策駕鈍少圖報效惟是資殿隆名
景德所以優於勲舊如臣於陛下更化之始雖叨居政
地徒勞數月無補毫分況以通籍禁帷自足假寵以臨
民吏豈宜復膺異數欲望聖明鑒臣惓款姑寢進職之
命容臣祇守官次他時不至瘵曠俾霑恩渥殆未為晚

庶幾全微臣辭受之誼亦或助聖朝綜核之公屢瀆天威臣無任激切惶恐之至

論治道劄子

臣聞治道貴清靜此先哲之格言也天下無事猶當以清靜理之而況多事乎多事之時而處以無事則事自定苟為不然徒為膠膠擾擾事日益繁去治愈遠厥今天下可謂多事矣吉凶之禮迭舉宮室之役並興與夫使命往來之交馳諸軍犒賞之頻併是皆不得已者適

丁歉歲生民艱食陛下發倉廩府庫以賑救之此又大
不得已者今太倉之粟在帑之金所餘無幾京府積鏹
漕司羨緡耗用畧盡州縣之間上下煎熬殆無生意人
勞財匱莫甚於此時自今以往日幸無事猶懼不給萬
一饑饉洊臻盜賊竊發或有意意外之費將何以支為今
日之計要當於不得已之中求其可已者已之可緩者
緩之朝廷之上鎮之以靜重百執事之間守之以靖共
州縣先於撫摩邊鄙貴於寧輯休息生聚年歲之間國

用稍裕民力稍蘇然後興滯補弊建利除害亦未為晚
此國家根本之計惟陛下留神幸甚取進止

乞進帝學劄子

臣聞聖人以天縱之能輔以日就之學固非羣臣所敢
望清光而窺道與然講求多聞咨訪治要則必有論議
之臣儒學之士通古今治亂者侍清燕之間而承顧問
之缺以舜文王之盛而有九官四友朝夕都兪於一堂
之上下至於秦之穆公魏之文侯亦有樂正裘牧仲與

夫段干木田子方之流相與周旋圖度以起治功斯道尚矣仰惟陛下睿智之高明典學之緝熙超出百王之上然猶分命講讀之臣番宿殿廬以待清問其於屬意承學尚論古人講道細氈之上甚盛舉矣然臣竊嘗觀漢之侍臣於長楊五柞之游未央宣室之燕未嘗不在而唐之十八學士日昃夜艾訪求政事商榷前載無常禮之間此固不宜專責職守之臣耆艾之士也臣愚欲望聖慈命有司討論倣唐開元六品以上待制於衙內

建中九品以上待詔於兩省立為定格日使館閣之臣
得侍左右以補遺忘庶幾泰山之一塵滄海之衆流或
有補於萬分之一取進止

辭免南郊加恩劄子

祭澤之大古有典常義利之間責在臣等方睿主慶成
於大報而湛恩燕及於多方不遺輝翟之微惠之至也
辱在股肱之近人謂斯何況饗帝者聖人之能而相祝
者臣工之職覲茲稷盛猥出會逢更疇爵土之封益重

冰淵之懼伏望皇帝陛下出神明之斷刊沿襲之文俯
徇愚衷特收成命

為男充辭免除敷文閣待制劄子

伏念臣奮迹孤童致身近輔恩流奕葉榮被一門猥如
繭犢之愚更冒簪犀之寵以功則曾微尺寸以世則既
越等夷罔懷歌器之危必致奪乘之咎伏望皇帝陛下
察其匪矜於邊幅憐其粗審於盈虛鼓缶而歌未圖引
養知苗之碩那復自欺終期成渙之還庶俾師虞之穆

謝免男回避劄子

臣自省何人誤蒙異眷父子並膺於繁使憲章靡限於
親嫌再具牢辭莫回淵聽惟是君臣之遇尤難將帥之
間念蕭何之舉宗從軍誰識老臣之感慨若卞壺之一
門死敵惟知異日之糜捐

謝賜御書風雲慶會閣劄子

君臣之遇夙幸依光乘雲之章下施輪奐拜嘉不稱仰
睇知榮伏念臣質陋朽樞任叨柱石負羈高邑陪光堯

御宇之興仗節行營屬嗣聖肯堂之始起衡茅於里社
從龍虎於天衢眷茲帝籍之舊恩表以璇題之美稱去聲
芒寒色正昭垂日月之光華心快目明煥發闌干之星
斗庇身有耀盡室無忘寵踰劉洎之登牀事異晏嬰之
更宅寫之琬琰祕藏河洛之書貽厥子孫俾識帡幪之
報

謝賜端午節物劄子

赤符彩縷老驚節物之新玉笋金盤歲荷君恩之重俯

念里居之秩方懷空食之慙珍送鼎來榮光益甚醉酒
飽德徒燕樂於明時食藥飲冰尚恪恭於晚節

謝賜酒果劄子

禁籞秋清燕列披香之邃使軺天降寵分推食之珍肴
核旅陳門庭賁耀想像藥洲之勝賞昭蘇漳水之餘生
恩厚莫名感深而抃大烹以養老弗稱於食功一飯不
忘舉必懷於報德

代人進故事

後漢書匈奴饑疫自相分爭光武以問臧宮宮
願得五千騎以立功帝曰吾方自思之宮乃與
馬武上書曰匈奴貪利無有禮信窮則稽首安
則侵盜豈宜固守文德而隳武事乎詔報曰黃
石公記曰柔能勝剛弱能勝彊舍近謀遠者勞
而無功舍遠謀近者逸而有終故曰務廣地者
荒務廣德者彊今國政未立災變未息人不自
保而欲遠事邊外孔子曰吾恐季孫之憂不在

顓臾且北敵尚彊而屯田警備傳聞之事常多
夫實誠能舉天下之半以滅大寇豈非至願苟
非其時不如息人自是諸將莫敢復言

臣聞天生五材兵不可去黃帝有涿鹿之戰帝舜有苗
民之伐啟有有扈之誓而商周遂以兵革命征伐之不
可廢於天下也尚矣然聖人貴去兵而不貴佳兵者誠
以兵凶器戰危事不得已而用之以禁暴安民而非所
以為功也傳曰兵猶火也不戢將自焚也是以聖人戒

之昔漢祖既滅四方而為平城之師於是有白登之衄
唐太宗既有天下而為高麗之役於是興魏徵之思光武
身濟中興閉玉關以謝西域之質卑辭幣以禮匈奴之
使審黃石存苞桑為萬世法天地之度日月之明卓乎
其不可及也矣昔者太王居邠狄人侵之事之以皮幣
事之以犬馬事之以珠玉弗得免焉於是去之岐山之
下黜戎狄之習興禮義之教以崇后稷公劉之業周之
王迹實肇基焉吳之敗越也越王反國身耕夫人織食

不加肉衣不重采與百姓同其勞十年生聚十年教訓而後用之吳以不祀天子致伯於越東諸侯畢賀原二君之初心豈誠甘於受辱恬於退聽而樂為人之下哉誠以力有敵不敵時有不可與其不忍一時之忿而窒方來之功孰若詘於一人之下而伸於萬人之上哉明者見於未形昧者隳於已成固不可同日而語彼臧宮馬武小夫之知一劍之勇徒為大言不知國計光武謂舉天下之半以滅大寇豈非至願苟非其時不如息

人大哉言乎非天下之至明至聖其孰能與於斯

唐書太宗嘗令封德彝舉賢久無所舉上詰之
對曰非不盡心但於今未有奇才耳上曰君子
用人如器各取所長古之致治者豈借才於異
代乎正患已不能知安可誣一世之人德彝慙
而退

臣聞景星鳳凰人知千百年一見之為瑞而不知其無
時不在天地間世人能見之者罕爾漢三傑秦之才也

建武二十八將新室之才也百里奚非愚於虞而智於秦裴矩非佞於隋而忠於唐其人則猶是耳然盛世用之則有餘叔世視之常不足嗚呼世豈真乏才哉古今用人之患大抵所舉非所用所用非所長使其人不緣謬妄曠官則以貪邪敗類如是則曰天下信無士哉天下之士舉如是而已哉小則有乏才之憂大則有輕士之禍此治亂之所由分也夫士之真賢實能固豈易得而輕之可得而輕者類非其人然而真賢實能乃用是

而遠去葉公子高所好畫龍爾而真龍見焉故曰思天下
有得士之實必在上無輕士之心欲在上無輕士之心
必君臣知用人之術善夫工師之制木也小為柁大為
櫨曲者為輪直者為桶接雲漢者以之梁百尺之觀蔽
牛馬者以之航千仞之淵是以天地之產有方而工師
之用無窮用人之說如是而已封德彝不知出此厚誣
一世未有奇才太宗所以累數十言深誅而甚絕之誠
足為萬世君臣之法也

資治通鑑韓昭侯有弊袴命藏之侍者曰君亦
不仁者矣不賜左右而藏之昭侯曰吾聞明主
愛一嚔一笑嚔有為嚔笑有為笑弊袴豈特嚔
笑哉吾必待有功者

臣聞賞所以勸功罰所以懲惡然功必待賞而後勸惡
必待罰而後懲則賞罰之用亦狹矣明主制賞罰以寓
勸懲之道因勸懲以示正大之心作於心形於言而勸
懲之道固已行矣唐德宗在奉天嘗遣一健步出視賊

軍辭以苦寒跪奏乞一襦袴德宗為之尋出不獲憫默而遣方是時人無離心士有鬪志及破賊之後貢賦鼎來府庫充溢而死義之士攜心惟新之望日阻此其故何哉德宗之用心則有間也昭侯謂明主嘖有為嘖笑有為笑知是道矣誠舉斯心加諸四境之內斯民將遷善遠罪而不知靡然自立於賞罰勸懲之外如堯舜之盛世孰能禦焉是知三旌之賞五流之罰者一弊袴一頻笑之積也比屋之封畫衣之化者賞善而罰惡之積

也韓之臣子終不聞有以術廣其君之用心以追古治有君無臣古之遺歎信哉

唐書憲宗與宰相論自古帝王或勤勞庶政或端拱無為互有得失何為而可杜黃裳對曰王者上承天地宗廟下撫百姓四方夙夜憂勤固不可自暇自逸然能選天下賢才而任之有功則賞有罪則刑選用以公賞刑以信則誰不盡力何求而不獲哉明主勞於求人逸於任人此

堯舜所以無為而治也至於簿書獄訟細煩之事各有司存非人主所宜親也

臣聞之荀卿曰人主好要則百事詳好詳則百事荒誠使人君雞鳴而起晏朝而罷日旰而食夜分而寐甚盛德也顧可謂詳略之間治效相去如是乎豈非以人君則有人君之體大臣則有大臣之體百司庶府則有百司庶府之體詳要其可紊哉今守令一也煩苛之政聞於千里則其人曰此特縣令之材耳夫一郡守猶然况

有天下者哉臣以知古之聖王非貴於徒勤也貴勤於知要者也何謂要人主之職在論一相非要而何何謂詳宰相統百官百官領衆職非詳而何宰相百官之不容好要猶人主之不當好詳宰相得其人則百官得其職人主之能事備矣宰相儻非其人百官不得其職將敝一人之聰明應萬物之紛沓雖堯舜不能以濟故其書曰元首叢脞哉股肱惰哉萬事隳哉然則文王之不遑暇食勞於求人者也虞舜之恭己南面逸於任人者

也善乎陸贄之論曰人主擇輔臣輔臣擇庶長庶長擇僚佐所任愈崇故所擇愈少所試漸下故所舉漸輕是故選自卑遠始升於朝者長吏舉任之寘於周行既任以事者宰相序進之才德兼茂歷試不渝者然後人主倚任之贄之言豈特為選舉設哉大抵忠臣良士所以愛其君憂其國者其論如出一口臣觀憲宗君臣之間可謂知所問答矣元和之風幾於貞觀豈不由此而致哉

資治通鑑子思言苟變於衛侯曰其材可將五
百乘公曰吾知其可將然變也嘗為吏賦於民
而食人二雞子故弗用也子思曰夫聖人之官
人猶匠之用木也取其所長棄其所短故杞梓
連抱而有數尺之朽良工不棄今君處戰國之
世選爪牙之士而以二卵棄干城之將此不可
使聞於隣國也公再拜曰謹受教矣

臣聞械樸之詩文王能官人也其詩曰芄芃械樸薪之

頽之棧樸小材也薪頽近用也文王不以小材廢近用
故其得士濟濟哉或儀于王所或紀于方國而序詩
者以能官人稱之材不能皆良人不能盡善中規者以
為輪中矩者以為桷短不軌尋尺者用之以備侏儒充
扃楔大而接雲漢者用之以梁百尺之觀航千仞之淵
又負而偃伏離奇而液瞞者莫不各當其用故曰大匠
無棄材聖人無遺善古之蘧蒢戚施刖者瞽者雖天民
之窮不廢焉負販者屠沽者受金發冢之徒猶足以當

一面抗方張乘風雲而書竹帛未聞以一青廢兼人之材也豈特論將惟然傳說之舉於野孫叔敖之舉於海百里奚之舉於市由余之舉於戎管仲之舉於離著之書冊傳之來世孰不謂然而後世張以科目拘以世類閹以小文自杜取才之路徒起當饋之歎詩曰采葑采菲無以下體為此詩者其知道矣非聖人其誰擇焉

新序魏武侯謀事而當羣臣莫能逮朝而有喜色吳起進曰今者有以楚莊王之語聞者乎武

侯曰未也莊王之語奈何起曰莊王謀事而當
羣臣莫能逮朝而有憂色申公巫臣進曰君朝
有憂色何也莊王曰聞之自擇師者王自擇友
者霸足已而羣臣莫之若者亡今不穀議於朝
羣臣莫能逮是以憂也莊王之所憂而君獨喜
何也武侯遂巡謝之

臣聞泰山不辭高而衆塵集焉故為五嶽宗滄海不辭
大而衆流歸焉故為百谷長聖人不自聖而愚者之慮

狂夫之言擇焉故為百世師況乎以一人之尊位四海之上日酬萬幾之務事物之至無窮而聰明之用有極是以人主不貴自用而貴能用衆合天下之聰明以為一己之聰明此大舜之所以為大也古者有衢室之問謗水之求聞善之拜不自滿假不吝改過不遑暇食數聖人者退然於身若不自足而事業掀天地聲名高日月未聞其以臣下不及為高謀事獨善為能也善乎子思之言曰君出言自以為是而卿大夫莫敢矯其非卿

大夫出言亦自以為是而士庶人莫敢矯其非君臣既
自賢矣而羣下同聲賢之賢之則順而有福矯之則逆
而有禍如此則善安從生今武侯一有矜色而正救之
言已聞小國之君有臣如此魏之所以獲重於七雄之
世也漢鼂錯以賢良對策謂五帝神聖其臣莫及三王
臣主俱賢五伯不及其臣借是以諛世主書之史冊為
當時羞其視痛哭流涕太息之書君臣優劣可以不議
而判

資治通鑑唐太宗嘗與羣臣語及教化魏徵對
曰久安之民驕佚驕佚則難教經亂之民愁苦
愁苦則易化譬猶饑者易為食渴者易為飲封
德彝非之曰三代以還人漸澆訛魏徵書生未
識時務太宗卒從徵言三歲天下大稔斗米三
四錢斷刑歲纔二十九外戶不閉行旅不齎糧
上詔長孫無忌曰貞觀初上書者皆云人主當
獨運威權不可委之臣下又云宜震耀威武征

討四裔惟魏徵勸朕偃武修文中國既安四裔
自服恨不使封德彝見之耳房玄齡奏開府庫
甲兵遠勝隋世上曰甲兵武備誠不可闕然煬
帝甲兵豈足耶若公等盡力使百姓乂安乃朕
之甲兵也

臣聞天下一道古今一民世之人尊古太泥論聖賢太
高而待已則甚怨望天下則甚薄故言仁義則以為迂
濶語教化則謂之不知務豈特貞觀之世為然哉昔孟

軻氏憤世疾邪斷然以堯舜之道號於戰國君臣曰謂其君不能者賊其君者也而自謂不能者自賊者也正謂此耳今夫宗廟之中未施敬於民而民敬墟墓之中未施戚於民而民戚孰謂民之澆訛難與為善乎哉使太宗即政之初不聽魏徵之言而納封德彝與上書者之說棄仁義任刑罰不信臣下外事征討而欲致貞觀之隆是猶却行而求及前臣知其必不能也然則聽納者治亂之原而人主之樞機乎太宗言中國既安四裔

自服又言羣臣盡力百姓乂安此乃朕之甲兵正使堯舜禹湯復生不易斯言矣臣竊觀神宗皇帝御製道鑑序曰漢之文宣唐之太宗孔子謂吾無間然者仰惟神聖發揮之妙所以昭懿鑠而幸來世者明矣遠矣後世可不鑒諸

唐書元和後數用兵宰相不休沐或繼火迺得罷李德裕在位雖遽書警奏皆從容裁決率午漏下還第休沐輒如令若無事時太和中中人


乘驛疾驅入金光門京城訛言寇至士民驚走
兩省諸司官有不及束帶襪而乘馬者李石在
中書曰宰相位望尊重人心所屬不可輕也事
虛實未可知堅坐鎮之庶幾可定視文案沛然
自若至晡乃止

臣聞達於事變者非在於臨事之時而在於無事之日
利害講明規模素定凡所以善其身與天下者固已自
信於胸中卒然遇之則其已大而物小是以物來而能

名事至而能辯覆却萬方躊躇四顧而不失其故常其
於應變也何有夫如是而後可以任天下之重而為天
子之大臣矣臣觀唐失兩河藩鎮擅誅立天子錫命惟
恐不逮德裕為相雄武軍將陳行泰戕史元忠以邀節鉞
德裕謂河朔請帥正坐報下太速軍得以安若少須之
下必有變已而陳行泰果為張絳所殺絳復誘其軍以
請於朝德裕亦置而未報絳又為其軍所逐然後徐以
張仲武為副大使代之德裕之遇事不惑明斷有體如

此則其從容多故之中豈偶然者李石器識雄遠當軸秉權一無所撓廷臣倚以為重是日京師羣無賴已持兵俟變徵石幾至亂矣昔苻堅寇淮淝謝玄問計於安夷夷然不顧游涉終日夜歸指授將帥各當其任竟以破賊長安城中訛言水且大至王商相漢不為之動二子固非李石德裕之倫而靜鎮之度亦其亞也臣謂朝廷出政之本宰相四方所瞻其經世之猷濟難之略自其所學而甲兵之問錢穀之對復有司存苟惟顛越於

倉卒之間眩亂於簿書之故則鼎軸之地其形渥矣有
天下者將何賴焉



欽定四庫全書

集部

定庵類稿卷二

詳校官庶吉士臣翁樹培

主事臣呂雲棟覆勘

謄錄舉人臣李憲喬

欽定四庫全書

定庵類稿卷二

宋 衛博 撰

表

辭免右僕射表

宰枋中居豈容虛受奏函上列未聽牢辭不勝淵谷之虞

游瀆乾坤之造

中謝

伏聞總制萬務正長百僚下以遂物

宜上以穆天緯位高責重於古難才人微望輕顧臣敢議
以功則屬大事而當一面臣無尺寸之可書以德則鎮浮

動而風四方臣唯譴薄之是魏徒抱朴忠之守誤膺神聖
之知曾歲月之幾何荷寵光之及此渙發大廷之號躡居
衆俊之先得位與時常情相慶循名責實有識為憂儻貽
撓棟之羞何補奪乘之咎伏望皇帝陛下仰圖帝載俯諒
臣愚名器不假人況於置相之重安危在出令必惟同德
之求追寢誤恩式昭盛舉臣之願也天實臨之

第二表

股肱之寄義必推賢肝膽之誠力期悟主游諭丁寧之

指尚憑冒昧之愚

中謝

臣聞萬務之繁可以綱舉而難

於周知四海之大可以心服而難於力勝惟古哲王之
圖任必視衆論之所歸德裕進而兩河革心楊綰用而
宗臣徹樂俾天下聳聞而風靡則主道不為而日尊夫
豈得於聲音笑貌之然將有見夫禮樂刑政之外伏念
臣寒鄉晚出一世孤蹤繇言語侍從之臣參柱石弼諧
之任術業則無以出廷臣之右資望則不聞居官簿之
先方人之乏之是承猶寬衆指儻國鈞之全界必致疾顛

上將遺盛世之羞下以觖四方之望願仍舊服別俟疇庸夫恩之深者難於言而臣未報不貲之恩請之煩者瀆於聽而臣屢抗不移之請進退罪也夙宵懼焉伏望皇帝陛下察其非徇於常辭憫其甚憂於速戾旁求中外寧之老成鼓舞風雷亦何嫌於反汗財成天地庶有補於同流一新岳牧之咨益重師瞻之地

謝除右僕射表

預政罔功久妨於賢路置相不善誰秉於國成籲天弗

從跼地無所

中謝

伏念臣愚無一得過不自量有君無

臣起遺歎於千古得時行道顧何愛於此身誓將騎甚
盛之知固嘗論天下之事有赫上聖照臨百官長轡遠
御則豈無應變之才視古太息則宜得非常之輔惟兼
聽可以屈至多之策惟大公可以服萬有之心方列位
之充廷豈盛時之乏使況君臣之間莫先遇合故功業
之建在昔為難以丙魏之興而孝宣雜用於刑名以房
杜之盛而貞觀有漸於禮樂如臣何有敢進於斯茲蓋

皇帝陛下功光祖宗明並日月勵精而治方將建大政
以興太平難得者時何以稱隆旨而塞厚望臣之欲報
誓以殺身然綆短者難於汲深而器小者不勝受大以
天下自任寧不為前哲之羞非王道不陳惟竊慕事君
之敬

謝除尚書右僕射表

參預暮年盡使治臣之不效咨疇百揆恐非同德之是
求抗辭牘以莫回愧此心之未亮

中謝

伏念臣賦材不

腆承學非優居言語侍從之官庶猶寡過司禮樂刑政
之柄將自速辜況春秋之義尊上公而人主之職論一
相豈以堂堂之大國屬之斷斷之小臣外將貽輕漢之
羞內無補尊堯之治雷不一風不再固知反汗之難尺
有短寸有長殆匪量才之謂勉即師瞻之所終虞鼎餗
之非茲蓋伏遇太上皇帝陛下起萬物之初游六氣之
辨撥亂世反之正有開貽燕之謀持衆美效之君猥荷
仰成之眷而臣依日月照臨之下蒙雨露拱把之中天

地恩深絲毫報蔑恥君不及堯舜永懷勵翼之圖當饋
歎無蕭曹儻副焦勞之念

平江府謝到任表

荐將使指方叨內地之榮就畀守符俄竊輔藩之重僥
逾特甚震懼靡遑中謝伏念臣家世寢衰人材猥下適
際休明之運屢更煩劇之除曾無片善之可名豈復優
遷之敢筮况茲會府密在邦畿轂擊肩摩衣冠指為走
集之路薨連棟接風物夥於昇平之時自非得資望素

高之人難以成禁令必行之治如臣么麼曷與選掄茲
蓋伏遇皇帝陛下日月照臨乾坤覆幬欲廣至和之化
兼收共理之臣顧若其愚亦膺重寄臣敢不深求民瘼
虔奉詔條任大力微當日思於官謗訟平政理誓仰副
於君仁

謝除觀察使表

奏對便朝初無一得觀風大國驟出中除孰云介冑之
下臣敢冒冕旒之殊眷控辭弗獲感涕徒零中謝伏念

臣本不知兵竊嘗憂世為民司命而不推進退存亡之計為國將兵而不明彼己勝負之機每聞恃敵之不來未有制人於先發謂餉道為難繼則因糧於敵者何義謂軍籍為尚寡則以少擊衆者何人縱酒高會而士甘半菽之憂黷貨多藏而下無乞襦之惠負負爪牙之託惓惓猷畝之忠不圖晚節之遭逢獲展平生之約結固未能聚米以圖破隴之狀儻庶幾借箸以明撓楚之非名一藝者無不庸上之賜也以小言而受大祿人謂斯

何茲蓋伏遇皇帝陛下勇智自天聰明協帝披輿圖而有四方之志捐城邑以慰多士之心猥如負乘之微假以廉車之峻臣謹當有死無貳唯敵自求以口舌而得官則有辭矣執干戈而衛上敢不圖之

又

幕府上功未論實效詔書班賞頓越彛章退欲避以無從凜莫知其所措中謝伏念臣勇慙超乘技乏穿楊趙括之讀父書豈明方略狐突之教子弟粗守愚忠願輸

橫草之勞未獲死綏之所屬邊陲之啓靈策戈甲以長
驅飲馬大江傳烽三輔惟疆場之不戒人謂斯何矧殘
敵之就屠天相我也稽之漢法簿問則宜大哉堯仁策
勲何有不腆二三之俘馘蓋圖偏伍之賢勞豈繫微臣
獨沾殊渥盡略橫階之秩峻超三品之華天大人微恩
深報蔑茲蓋伏遇皇帝陛下推仁以保四海信賞以勵
百工親屈帝尊臨見執戈之士猥如臣賤鼎來出綍之榮
顧凡冒險以直前孰匪聞風而知勸臣敢不益鞭駑蹇

勉副龍光以克敵示子孫世保康侯之錫不以敵遺君
父誓空老上之庭

辭免參知政事表

帷幄近嚴豈容序進封章剴切未聽牢辭仰天日之向
高凜淵冰而莫喻

中謝

臣聞因任以成功者聖人之能

事陳力而知止者臣子之令圖儻惟囊括以兼容何但
棟隆之必撓臣之已試衆焉可誣學本師心而有古人之
愚道以事君而有違俗之累固嘗論天下之事將以報

人主之知而步蹇者不可絕馳器狹者竟難大受所幾
萬分之一了無尺寸之長縱未能自弛以謝曠官敢復
奸不避而羞盛世人知居寵臣懼速辜伏望皇帝陛下
矜不移之愚遷已行之令上以弭名器假人之誚下以
紓負乘致寇之憂庶穆師虞少安微分

謝除參知政事表

奉為真之詔進秉政機抗引避之章莫回渙汗拜嘉如
隕委重奚勝

中謝

伏念臣奮湖海之陋乏廊廟之具生

死文字僅類蠹書作為詞章不過蟲篆烏睹國家之大
體偶陪英俊之諸儒冒昧進遷雍容獻納北門西掖敢
論潤色於皇猷右府中臺莫負安危之注意未報不貲
之德長懷自弛之圖側聞有命之自天恍若履冰而待
日飲河之腹久已易盈伏櫪之姿詎堪遠到茲蓋伏遇
太上皇帝陛下功高與子道妙凝神植桐梓於拱把之
中作成有造居柱石於弼諧之上佑啓無窮天地均恩
頂踵思報惟股肱之戴后敢忘一體之同盡心力以事

金史卷二
君庶答兩宮之遇

謝除醴泉觀使表

天啓承乏績效蔑聞祠館祈閒綸言賜可保孤蹤於始

末戴上聖之恩私

中謝

伏念臣屬荷主知起繇家食秉

旄仗鉞六飛將戒於徂征被甲據鞍一介敢辭於耄耄

烽烟間息羽衛留行獲逃避事之嫌敢上解兵之請以

候就第雖自適於退藏飽食無功益懷慙於尸素茲蓋

皇帝陛下定謀制敵觀變御時披天下之輿圖固不忘

於武事以關中為根本宜坐治於明堂遂令負約之臣
歸享杜門之樂臣敢不心懷止足身戒滿盈視晚景於
桑榆已無多日奉祠庭之香火永祝明時

辭免御營使表

羽衛時巡必嚴先置囊封夙奏恐玷殊私未推從欲之
仁洵貢投誠之請

中謝

伏念臣受恩深厚竊位通華當

疆場之多虞豈頭顱之敢愛唯見阡危之迹久懷斂退
之心蓋積毀所加既乏江東之望而寡謀有素寧知堂

上之奇鉛刀已試於無庸鼠璞何堪於再獻方聖上焦勞於宵旰宜衆賢馳驚於事功退竊自量實虞非據伏望皇帝陛下諒籲天之懇與察父之慈畧反汗之小嫌收出綸之成命俾歸散地獲保餘年

辭免御營使奏狀

附

竊以戎輅親征將圖大舉天營置使必屬重臣敢謂么微廼叨器使中謝伏念臣頃緣衰晚得請退閒方睿照之當天攬羣才而在御孤蹤最爾過聽伊何收汗馬之

勞則臣力既憊出籌幄之奇則臣愚素甚自量既審冒
處為難豈惟將致於疾顛抑亦恐來於衆誚伏望亟收
成命改畀時才庶穆朝僉少安愚分

謝除御營使表

有司夙戒將巡細柳之軍行衛先驅誤典鳴鑾之仗懇
辭弗獲僭受奚堪

中謝

伏念臣結髮戎行半生環列雖

執戈衛社粗肩自奮之忠然積羽沉舟幾致疾顛之咎
破膽猶驚於曲木殘骸何取於勞薪惟二聖之深知銜

大恩而未報太上起臣於戎馬飲江之際僅無侵軼之虞陛下眷臣於龍飛御極之初復值乘邊之警將整徂征之旅俾司禦侮之權俯憐蒲柳之先衰敢覲桑榆之末效茲蓋皇帝陛下沉幾獨運善任無妨幸渭而責可汗力奮唐宗之武封殷而伯西土行收秦穆之功臣敢不益堅晚節無愧初心追督將而守江湖共壯淮壖之勢至金城而上方畧願為歲月之圖

謝除樞密兼參政表

基宥密之命莫重本兵負端右之才乃堪聞政揆寸長

而何有共二任以奚勝

中謝

伏念臣蚤以諸生出逢興

運學不足以窺聖賢之能事識不足以明治亂之大端
追琢其章晚悔雕蟲之習支離其德分安社櫟之生猥
緣黃甲之名浸補皂衣之缺承明三入有忝昔人出守
一麾何功方面既不能扼貌蠟言以同流俗仍未聞草
衣木食而賦歸耕甫即鋒追登冠橐從更冒非常之渥
遂班在服之光曾日月之幾何荷寵靈之及此愧深顏

厚恩大人微茲蓋伏遇太上皇帝陛下體道太清凝神
姑射以爾衆請命用肇造於我家為天下得人迺燕詒
於翼子曲輪方桷咸自儲材厚地隆天莫非戴德誓竭
股肱之力共閔宗廟之休徇國之心捐軀以誓

謝除參知政事表

參萬事之幾久辜試可翫大公之選竟使為真永惟共
政之臣將重本朝之勢妨賢是懼報國何從中謝伏念
臣守承學之傳乏佐王之畧恩隆過聽進許陳愚察其

任直而不欺謂其有猷而必告精神之會千載難逢體
貌之私一介安取冒昧螢光之近日激昂騷力之負山
意廣才疎固少成事憂深責重幾欲醉心幸免則多詔
除惡在矧多士朋來而在服而一人高拱以圖功駟馬
輕車盡効夷塗之駕汗顏血指第虞善斲之羞勉與將
衡敢安奪乘茲蓋皇帝陛下顙俊以尊上帝惇德而難
任人察其處帷幄之近嚴粗無大過使之輔朝廷之遺
忘倘有寸長然執器寶者常恐勿勝而涉淵冰者罔知

金史卷之二十三
卷二
攸濟險夷一節誓當有死命而無二心夙夜同寅共期
總衆職以稱上意庶行所學不負初心

辭免樞密兼參政表

風雲之號敢覲力回肝膽之誠倘容理奪重愬妨賢之
悃仰祈從欲之仁

中謝

臣聞國勢之重輕實係人才之

用舍矧司兵本兼預政幾非有宏毅任重之臣敢在精
神折衝之位猥如臣賤乃辱疇咨以道則臣學僻而師
心以事則臣才疎而負俗雖曰激昂而有志固嘗展布

以事君尺短寸長僅足有司之事內親外撫將為盛世之羞人知帷幄之榮臣有淵冰之懼伏望皇帝陛下仰圖帝載俯念臣愚見善則遷亟反已行之令不能者止何妨更照之明別登三壽之朋下益羣黎之望

謝除樞密兼參政表

本兵之任難以次遷共政之臣豈惟官備仰體安危之注意可無文武之兼資孰謂公朝姑容倖位

中謝伏念

臣學迂而寡要言大而少成賢不聞於諸大夫國人仕

所望於祕書郎縣令太上過錄臣於官賤人微之日陛下優假臣以出長入治之權天地恩深絲毫報蔑斷簪跼履未忍棄捐今褻昔襦或堪惠養粗行所學無負平生敢圖一節之趨亟位六官之長蹈高門之第滋愧重來佩華袞之章誦言勿稱當上聖熙天之運而大廷籲俊之公猥容措康瓠於鼎鼎之陳必有駕鴈鳩於霄漢之誚奪乘何補撓棟為羞茲蓋皇帝陛下當饋懷人勵精求治長轡遠御已紹開億萬年之休公聽並觀俾益

贊二三臣之後臣之得位久已誓心道之將行蓋思明
目以報天子時哉易失可無藉手而見古人稱塞為期
糜捐後已

賀郊祀禮成表

乾道乙酉元日

國之大事不可得兼歲之上辛於斯為盛當四海貢圖
之日表一人受命之符事越前聞慶覃廣宇

中賀恭惟

皇帝陛下聰明時憲聖敬日躋備文武之功是堯而已
盡君臣之道唯舜為然和敵國以靖邊塵戢干戈而肆

時夏秉茲馨德信厥精禋惟吉之從順考魯侯之三卜
有國之舊率由至道之宏規采儒臣獻胙之儀備曠古
事親之舉臣有拘封守莫與駿奔歌噫嘻之詩想見成
周之禮樂下恩澤之詔願宣大漢之威靈

辭免郊恩表

慶條顯畀志願牢辭避牘報聞迹疑異衆

中謝

伏念臣

擢從散輩服在邇僚識不足以佐神明之幾才不足以
適方圓之用雖願效佐王之畧敢與知格帝之功屬修

必祀之恭曾之秉文之助大裘袞冕咫尺於威顏玉璫
黃流陟降於左右猥無闕事安敢叨榮伏望皇帝陛下
制爵以賢循名責實欽上帝溥臨之福特與民同裁歷
年謬賞之文姑從近始茲為盛舉敢復常辭

謝郊恩進封開國侯表

奉瑄陽位斂時昭事之休舍爵路朝辱是等功之典迫
承威命愧越初心中謝伏念臣本章句之儒乏公輔之
器小言而受大祿殆將遺滿溢之羞聖人而責愚臣何

以塞優游之望茲告成於熙事曾莫佐於清光壇壝犧
牲各以物序降登上下豈曰賢勞第惟神聽之嘉娛方
眩珍符之委況敢圖班邑遂藉通侯視諸封賞之科愧
彼烈文之輔茲蓋皇帝陛下統承千載道暢八紘備物
以告神明昭格昊穹之眷錫壤而光祖考猥先政事之
臣惟德厚者報豐而位高者委重敢失墜事君之節用
答揚天子之光

辭免江淮都督表

假鉞視師固難因任背城決戰此復何時敢修退避之

常辭尚拜丁寧之溫詔

中謝

伏念臣志卑莊鷄技拙黔

驢少不知圯上之書老且乏江東之望發蹤指示或因

人而有成賜履專征則在臣而何敢矧當饋歎蕭曹之

日必中禁得頗牧之賢以道德安強之威成江淮表裏

之固皇咨裴度宜率舊章今拜淮陰徒驚衆聽伏望皇

帝陛下亟還渙號改畀儒英要聞晉盜之奔秦無俾匈

奴之議漢

謝除江淮都督表

駟介乘兵未效獻俘之禮五侯九伯迺專賜履之征孰謂臣愚猥蒙制可退循牆而莫避致專乘以為憂

中謝

伏念臣號令之前賢之風勇力廢橫戈之習年之將耄語既諄諄心之不長髮猶種種久負賜骸之願晚蒙血指之羞以且投閒散之身護非素拊循之士蜂屯蜩聚而尚納憑陵之侮雪虐風饕而未休匱薄之師惟帝王之兵所貴必全雖廝與之卒靡容不備久留征討內切

主臣援枹鼓則忘身死其所矣安社稷以為悅人謂斯
何夙夜以思進退維谷茲蓋皇帝陛下聖智同符於藝
祖寬仁上協於光堯始以太王之心姑狗敵人之欲繼
下元封之詔將躬武節之威猥遺見大夫原闕二字之賢過
取一个臣無他之技臣敢不力修戎律躬履顏行收尺
寸之功敢事便文之舉固表裏之勢當懷經遠之圖

謝除徽文閣直學士知荆南表

內閣寶儲上憲圖書之府赤墀文石追參供奉之班萃

諸儒稽古之榮賁白首乘邊之役中謝伏念臣甫偕召
節入侍禁塗曾詔墨之未乾已思綸之狎至坐念江湖
之遠迹周寰宇之間廣樂鈞天直疑清夢蓬萊藏室尚
接英躔炯然欲報之心老矣既愆之力茲蓋伏遇皇帝
陛下鼎新庶政器使羣臣當饋以思遐想蕭曹之佐推
轂而遣當求頗牧之材顧臣無纖芥之能何以裨寥廓
之見奄長楊而連五柞空懷屬御之塵輕尺璧而重寸
陰請示洛書之訓倘酬晚遇無愧夙心

謝除刑部侍郎表

乘軺所布方披三輔之圖持橐近班猥玷高門之地報
章有煥拜起知榮中謝伏念臣雅志倦游一官平進雖早
緣推擇嘗參國論之餘而老益粗踈伏在吏塵之下牧人
馭衆曾乏寸長奉使典州久逾二紀孰謂桑榆之晚親
承旒冕之知以賤有司之臣假小司寇之職高第而補
漢廷之缺臣匪其人再見而位趙國之卿事光在昔茲
盖伏遇皇帝陛下恢張治具衆建人才察臣官簿之歷

年宜知報國謂臣吏道之專智可與平刑蹤寔明廬往
圖末路臣敢不益鞭駕蹇仰副鴻私濫司空城旦之書
當體好生之德辱天子從官之選敢忘獻可之忠

謝除吏部侍郎表

趨一節之朝方起及郊之敬佐六官之長遽叨即命之
榮內揆微蹤仰辜隆施中謝伏念臣滿襟塵土投老光
陰伏櫪之嘶詎堪致遠飲河之腹久已屬饜膾將造膝
以陳愚冀即奉身而退處敢虞幸位有泰公朝以日月

論思則臣學殖之就荒以銓綜人才則臣風裁乎何有
勉即鵷鴻之綴終慙樗櫟之非茲蓋伏遇皇帝陛下道
暢八紘統承千載舞雲門而奏大夏兼存蕡華之音執
玉帛以見羣神不鄙陶匏之用施諸俊籲亦罔遐遺臣
之會逢何以稱塞斯猷惟后之德永肩一心視死猶生
之年有如皦日

辭加鎮表

出二節以授師茲為曠典叫九閭而請命尚閱俞音中

謝伏念臣伏在里居猥當人乏自省據鞍之已老迫承
假鉞之專征設九拒其有餘敢議昔人之能事欲壹闔
其可得實遵弭敵之宏圖惟上方興受命之符乃元日
獲始郊之卜德馨上達兵祲旁銷曾何閔閔之可躋辱
是土田之多與稽諸近比得者幾人以王命討不庭臣
之職也貪天功以為己人謂斯何伏望皇帝陛下察其
引分之由中錄其臨寵而思戒風雷鼓舞雖作號之已
孚日月照臨尚容光之必屆

第二表

益地之恩正虞虛授循牆之請所幾必辭自憐惻款之
愚未諭丁寧之旨中謝臣聞祭澤之大以侈神靈之休
賞國之經必示勲勞之勸而臣內缺奉璋之敬外無橫
草之功猥緣惠駿之公敢冒列臣之寵臣聞命矣國謂
君何伏望皇帝陛下聖度隆寬皇明委照亮其止足而
知懼知其展布以事君辭邑而請繁纓非有效尤之志
吐哺而趣銷印益彰從善之仁

謝加鎮表

節旌旗纛晉長二師山川土田益陪多賦揚大廷而作
號視盟府以知慚中謝伏念臣被遇聖朝逢時肇祀屬
有護羌之役阻陪上雍之班惟國之大事在戎要洗櫓
槍之厲氣而天之所助者順果符帷幄之成謀蕭然班
馬之聲允矣止戈之武蓋聖人為能饗帝故羣臣莫望
清光蔽自上心迄成熙事曲推厚下之澤過錄守封之
臣茲蓋皇帝陛下清明在躬寅畏享福一頓一笑不以

假人大邑大官宜章有德而臣早嘗險阻晚脫阨危功
不腆而祿既豐心弗強而身餘幾間兩社以輔公室猥
為大國之羞封萬戶而為帝師益引下臣之分

天申節賀表

歌薰廣殿初占夢日之祥擊壤黎民率罄後天之祝驩
傳萬宇運際千齡

中賀

恭惟太上皇帝陛下淵懿聰明

剛健中正功成不有黃屋非帝堯之心道妙常存赤水
契有熊之寶備九州四海之奉極五日一朝之娛慶集

宗祊事光今古載屬誕彌之旦聿彰丕應之符臣矯首
內庭庇身外鎮獻金鑑之錄雖遠龍光望玉卮之觴惟
勤虎拜

接千歲之統天命有開盛五日之朝帝觴惟謹慶覃家

國驩動神人

中賀

恭惟太上皇帝陛下登濟大業而不

有其功并包衆論而強名以道褰裳大寶執契元珠

無為而尊者天既超象數有德必得其壽何待禱祠笑

傲羲黃粃糠堯舜臣屬將使傳阻造宮庭曾無漢家令

之言益彰聖孝第有華封人之祝敢貢愚忠

炎夏應期實啓離明之運後天稱壽光昭震夙之符慶

濫縣區祥開是日

中賀

恭惟皇帝陛下丕膺歷數紹復

基圖施仁猶列聖之心不忘兼愛稽古以百王之道坐

格純熙三階平而風雨時五穀熟而人民育驩聲和氣

自然雅頌之興備福儲祥不待禱祠而致受天之祐與

世咸休臣將命淮壖馳心魏闕九賓在列莫陪漢殿之

儀萬壽無疆徒罄華封之祝

謝賜生日禮物表

犬馬之生日還初度牽醪之賜式在太官孰虞一介之下臣敢辱大君之善養腹饜德施頂戴榮光

中謝伏念

臣本章句之儒乏經綸之具眇矣餅盆之陋器參諸鼎鼐之後陳借箸以籌何補辰猷之告當饋而歎尚辜旰食之憂乃膺備物之將過錄左弧之始茲蓋皇帝陛下禮嚴體貌義篤股肱將共寄於安危爰下同於欣戚臣之拜賜敬以誓心猶已饑天下之民願景前修之志使

人有君子之行庶揚既醉之休

謝賜對衣金帶鞍馬表

上褚兼衣侈以萬釘之寶內閑策駿沃如六轡之華心

驚去國之陳人目眩充庭之大貺

中謝

伏念臣少馳藝

苑長服官箴被蘇子之故貂窮通一致悟塞翁之歸馬
得喪兩忘敢謂餘生更叨蕃錫茲蓋皇帝陛下垂裳御
宇折筭平戎錫命之章舉知安燠懷人之歎下軫隳隤
有光帷幄之臣俾強筋骸之報惟一夫之短褐猶已寒

之儻庶政之駭輿又誰咎矣

又

悸帶為容曩猶不稱據鞍示壯晚復何堪尚分廩庫之
珍良用撫節旄之恩渥

中謝

伏念臣奮由徒步賤且執

鞭纂楚制之短衣甘為下走賜齊官之三服望絕榮塗
猥緣推擇之歷年屢忝便蕃之大貺赤芾之子在位何
觀繁纓以朝致寇是懼茲蓋皇帝陛下念功惟篤圖舊
過優捐千里之封於兩驕驕而何愛公四海之望縱一

敝袴而不私顧臣無汗馬之勞何以弭濡鵠之刺况臣以既憊之力荷均佚之恩鳩杖白衣散吏敢同於前輩安車駟馬傳家願洎於小臣

謝賜生日生餽表

勅勞興念載臨六射之辰錫予流恩遽拜九重之命赧然是懼厚矣不貲中謝伏念臣奮跡羈單逢時隆盛陞九級而遠地久肅護於巖除鼎三足以承君實濫陪於公秩自知過分已幸丐閒既開異姓之封復陟面槐之

位所慚朽質莫報大恩敢云初度之期猶軫不遺之念
珍兼飲饌欽承厚意之將膳沃殮體益重匪頌之式茲
盖皇帝陛下普臨庶類優寵舊臣顧此哀遲特示饗飧
之腴眷言疇昔尚加體貌之隆臣敢不內揣僥踰仰懷德
惠賜尊推食豈惟醉飽之私銘骨鏤肌誓竭涓埃之報

奉使汴京賜燕等謝表

開閭闔之道館置如歸踐籩豆之陳殽烝有衍首拜濡
雲之渥頓空蒙露之塵中謝政本施仁善優去殺惠顧

展親之國寵綏將命之臣稱萬年之觴預想會朝之勝
馳四乘之傳佇陪俠陸之趨

賜酒果

宜城之貢湛若淵濤上苑之珍粲為遶實

中謝

心味道

腴之旨手褰藝圃之華酌彼金罍有忝知勞之賜報之
瓊玖徒深永好之思

真定府賜燕

馳四達之郊方首適燕之路陳三饋之簋又沾在鎬之

恩中謝接下思恭為國以禮有赫衣裳之會不寧傳送之臣序其情而閔其勞君之賜也舍其大而拜其細主則擇之

賜酒果

醕酎躍波甘梨比蜜彼美魏都之富兼榮晉錫之蕃

中

謝圖功尊俎之從容受計豆籩之奔走蘭興桂發配明德以惟馨春熟夏成歸大鈞之播物

燕賓館賜燕

一介行李甫休聚櫟之郊三命循牆亟辱班荆之燕

中

謝脩已以安百姓養賢以及萬民大成為國之基不棄
善鄰之寶公當享卿當燕敢墜彛章君以禮臣以忠願
揚休命

賜酒果

望五陵之佳氣近接蓬萊命六轡之皇華載馳原隰旨

甘維旅孤陋難蒙

中謝

受四海之貢珍交萬物而有道

使而未致既寬私飲之誅受之勿辭有負計功之賞

又

舍館既定益忘徒御之勞邇豆孔嘉申以樽罍之富匪
頒沓至荷戴奚勝中謝荷天覆之仁篤臣隣之愛投醪
均惠雖造次而不忘懷核為恭豈周旋之敢墜積有拜恩
之寵若為論報之方

朝見畢賜燕

發幣公朝甫達頌椒之慶肆筵候館載均在藻之歡

中

謝設太極之仗以見羣臣采長樂之儀以朝正月恩隆

歲飫義篤方來繼好之謂禮經天所命也大饗以仁賓
客臣敢奸之

賜酒果

珠庭日角退猶眩於天光玉勒金貂遽下馳於星使登
受便蕃之錫仰慚恩異之隆中謝臨極辨之朝仰容光
之照義由一貫譬植梨橘柚之同歸賜出尚方固漿醴
醬醢之異制拜嘉有耀懷感無窮

賜分食

廩繼粟而庖繼肉日飫大烹燕有好而鼎有陪禮加推
食中謝傳餐決事當饋懷人雖八物之用珍非我志也
惟一夫之失職猶已饑之絕甘當御之筵委況越疆之
使屬饜厚德震激微衷

賜酒果

麟鳳之泉飲能却老燕秦之植當比封君貌是遠臣萃
茲隆施中謝沉酣六藝長育羣材崇館餐於緇衣好賢
不倦選威儀於既醉備福方興弗遺一介之微重增兩

君之好永言匪報有愧於中

花燕賜酒果

御柳宮花轉春風於廣內金盤玉筋溢喜氣於人間中
謝德配天倪功參時令羽觴傳滿恰叨飲御之榮賓豆
載加退有分甘之惠荷君恩之重辱顧臣賤以奚勝

射弓燕賜酒果

獬首諸侯之節臣敢預聞魚麗萬物之多君能用禮中
謝寢兵不試恭已無為清者聖濁者賢各遂熙臺之樂

大為果小為菰無非貢篚之珍拜手以還銘心莫既

賜生餼

館給之須日勤候吏餽牽之賜式在太官珍送則優食
浮是懼中謝禮隆鼎養治尚豐亨干戈載戢而民以寧
祝史無求而福自應胙膳以親兄弟之國方懋爾猷飲
食以盡忠嘉之心斯惟后德

燕賓館賜宴

朝受命而夕飲冰猥無乏事入有勞而出贈賄寵備多

儀折俎在庭征驂顧櫪中謝交鄰有道御衆以寬有嘉
一介之勤屢飭九賓之副奏驪駒之闕即問所塗回龍
尾之班第增存闕

賜酒果

泰極函三已致元政之祚東皇太乙又違咫尺之顏使
指趣臨賜儀俯逮中謝厚送將之禮篤終始之恩歸奉
春祺願介兩君之眉壽旁流解澤庶偕百果之敷榮

真定府賜燕

歸騎載驅屢更信次使貂中飭遠示燕私中謝積善在躬成功裕後珠盤玉敦篤信摯於齊盟昌歆形鹽享多儀於備物若奉當陽之御不忘加敏之恭

賜酒果

王人俯暨帝賚曲加睠言改施之遙用畀中塗之寵中謝道侔乾施智秉離明顧醴齊之飮馨既篤有邦之慶咏天桃之蕢實寧忘爾室之私載惟遮道之榮盡釋馳車之歎

汴京賜燕

龍堆遐舉初無可使之才
鸛垤朝鳴敢有懷歸之喜
眷茲道阻式是篚將中謝
惠加行李之往來禮大東都之供帳
吳頭楚尾肅歸馭以星馳
趙北燕南望修門而雨絕
尚綏永好溥燕函生

賜酒果

使旌萬里奉美報以遄歸
君門九重瞻晬容而逾遠
上恩滋至亟饋中來中謝
慈發天衷愛均臣體
曲軫驂駟

之敝爰敷綸綍之華惡旨酒而好善言特厚致勤之禮
食果實者後君子敢隳維德之儀歸載有光感銘增固

